

deni, vol una altra sorte de incanto, *videlicet* lui e sier Hironimo Querini savio sopra la mercadantia, *videlicet* che 'l dito incanto sia reformato in questo modo, che li Patroni debano far il deposito a di 15 Marzo e provati 3 zorni poi soto pena di ducati 500, e non dagi la paga se prima non sarà zonto il salvoconduto, habi di don ducati 4000 per galia, et siano numero do, *videlicet* 1000 di le Cazude, 1000 di Provedadori sora i Officii, non intendando debitori dil Sal, ducati 1000 di Avogadori extraordinarii, et ducati 500 di 3 Savii provedadori sora la revision dei conti, e ducati 500 di X Officii, salve sempre le anzianità possino seontar in men di etc. Dagi a l' Arsenal contanti ducati 500, justa il solito; non se possino prevaler di doni si non partito el Capitano, e dando le piezarie, vadi prima a Saragosa, stagi 3 zorni, poi a Portomagro e col Consejo di 12 possino andar altro, non passando Cao Maserata, fino a Tesora e in tutti do lochi stagino zorni 15, e in uno solo 12, e parendo posino andar a Zerbi, stagi zorni 10, a Tunis non mancho di 8 et più di 20, a Oran 12, dove col Consejo di XII possi andar nel regno di Fess, cioè a Belise Lagomiera, overo a Larachi e stagi zorni 15. Poi col nome dil Spirito Sancto vadino a dretura a Lisbona, et non havendo salvoconduto per li mori e zudei dal re di Portogallo, li lassi a Larachi, over in Sibia, dove vorano, et li a Lisbona stagino zorni 15: e possendo aver specie, habino di nolo ducati 4 di specie grosse, e di le mende ducati 5 dil mier sotil; il resto di le specie pagi quello si pagi di Levante, excepto il piper pagil consueto, e i zucari ducati 4 dil mier sotil. E partite di Lisbona, vadino in Sibia, overo a San Luca, dove parerà al Capitano col Consejo di XII, e ivi stagi zorni 10. Poi vadino in Armaria, e non havendo il cargo, col Consejo di XII possi andar o non andar in Carthagenia dove stagi di 8; et non andando in Carthagenia, vadino de Armeria, *retro tramite*, a Valenza et possi star zorni 24, et havendo il cargo, stagi zorni 10 e possino andar al Fax de Tortosa, dove stagi zorni 8, e de li venir a Saragoza di ritorno, dove stagi zorni 3, poi vegni a dretura qui a Venexia. *Item*, la batalation di Tunis, di sier Beneto e Sebastian Dolfin e participi, e sia data la comission al Capitano et letere al re di Portogalo, come parerà a questo Consejo.

148* Parloe primo, per questa opinion di mandar le galie di Barbaria a Lisbona, ch' è terra dil re di Portogallo per levar specie, in favor di la parte el dito sier Zuan Contarini savio ai ordeni, qual con li compagni vol le galie vadi al viazo solito di Barba-

ria, e non innovar alcune cosse. Poi parlò sier Zuan Dolfin provedador sopra la Merchadantia, laudando l'opinion di sier Zuan Contarini di mandarle a Lisbona, ma vol, dove se dicea in l' incanto che zonte le galie a Sarachi si mandasse dal re di Portogallo a tuor salvoconduto per li mori e zudei sono su le galie, lui vol che *de presenti* si scriva una letera al ditto Re per aver ditto salvoconduto, di la qual si averà la risposta avanti le galie parti, e fe' lezer dita soa opinion e la letera vol scriver; *tamen* dicendo per il Colegio, poi per questo Consejo sarà scripto in quella forma parerà. E venuto zoso, sier Zuan Contarini e sier Hironimo Querini introno in opinion. Poi parlò sier Fantin Zorzi savio ai ordeni; *demum* andò in renga sier Marco Antonio Loredan, fo capitano a Padoa, qual non sente mandar galie a Lisbona per esser la Soria dil Signor turco e l'averà a mal, perchè come si prende quel trafego, si lasserà il viazo di la Soria con danno di l' intrada di esso Signor turco, che è adesso Soldan di la Soria e di l' Egypto, comemorando che al tempo l'era nel Consejo di X, fu fatto una Zonta per questa materia di Coloquut, che è stà la rovina di questa terra. Et vene uno zudeo per il re di Portogallo per dar l'apalto di le specie a la Signoria che di l' India veniva li, con far ogni largo partido. Et *tamen*, disputato la materia, non parse per non ofender al signor Soldan, et adesso volemo ofender al Signor turco; sichè li par esser in uno nuovo mondo a udir questo.

Poi andò in renga sier Hironimo Querini provedador sora la Marchadantia; fo molto longo. Sier Andrea di Prioli provedador sora la Merchadantia, nulla volse meter; e il 4.º, ch'è sier Francesco Bernardo, non fo in Pregadi. Andò le do opinion: 4 non sincere, 16 di no, 36 di quatro Savii ai ordeni, 145 di sier Zuan Contarini savio ai ordeni e altri nominadi; e questa fu presa.

Noto. Sier Hironimo Querini predito disse do cosse: haver udito dal clarissimo domino Alvixe Pixani procurator, che l'è mejo ritornar le specie cha la liberation di 1000 milia persone di l' Imperador che fosse soto Padoa; l'altra che domino Zorzi Emo procurator li disse, saria meo non si avesse trovà la via di le specie di Portogallo che la Signoria aver nata in Terra ferma, perchè sta terra saria d'oro; et a queste do parole il Consejo fe' un grandissimo sussuro. Disse sier Zuan di Prioli qu. sier Piero procurator, havia auto verzil di Portogallo, mandà in Soria e di quello vadagnato, di la qual Soria solea venir.

Fu posto in questo Pregadi, a di 18 Fevrer, per 148½